



PRAKATA

**MENTERI KEWANGAN
MALAYSIA**

Pandemik COVID-19 terus memberi kesan kepada negara-negara di seluruh dunia, di mana kemunculan varian-varian yang pantas menular telah menyebabkan krisis kesihatan dan ekonomi yang berlarutan. Namun, kini mula jelas terdapat tanda-tanda pemulihan ekonomi global dipacu oleh kadar vaksinasi yang dipercepat di negara-negara maju dengan sokongan fiskal yang tinggi. Walau bagaimanapun, pemulihan global ini tidaklah sekata memandangkan kebanyakan negara berkembang pesat dan membangun masih menghadapi rintangan dalam usaha vaksinasi besar-besaran mereka. Sementara ekonomi maju semakin beransur pulih, banyak negara termiskin di dunia masih ketinggalan, dan memerlukan usaha yang lebih gigih untuk menangani kesan besar pandemik ini ke atas ekonomi dan manusia sejagat.

Di persada negara pula, sejak bermulanya wabak COVID-19, Kerajaan telah melaksanakan lapan pakej rangsangan dan bantuan berjumlah RM530 bilion, di mana RM225 bilion telah diumumkan pada tahun ini. Kesemua pakej ini juga diperkukuh lagi dengan langkah Bajet 2021 dan telah memanfaatkan lebih daripada 20 juta orang dan 2.4 juta perniagaan seterusnya mendorong pertumbuhan separuh pertama tahun 2021 dengan KDNK meningkat sebanyak 7.1% berbanding penguncupan 8.4% dalam tempoh yang sama tahun lalu.

Di sebalik cabaran berterusan terhadap pematuhan SOP, tindakan pencegahan yang bersasar dan isu berkaitan pembukaan semula sempadan dan mobiliti fizikal, prospek untuk separuh kedua 2021 kekal positif disokong oleh pembukaan semula sektor ekonomi dan sosial secara beransur-ansur. Memandangkan semakin banyak negeri beralih ke Fasa 3 dan 4 di bawah Pelan Pemulihan Negara dan Program Imunisasi COVID-19 Kebangsaan (PICK) diperluas lagi untuk merangkumi remaja dan anak-anak muda, kita telah mampu mengorak langkah secara selamat dan sistematik bagi menggerakkan semula sektor pendidikan, selain daripada membenarkan lebih banyak aktiviti ekonomi dan sosial. Perkembangan ini yang disusuli bantuan dan langkah sokongan berterusan akan memacu prospek pemulihan negara dengan unjuran pertumbuhan antara 3% hingga 4% tahun ini.

Menjelang tahun 2022, kita akan tetap tangkas dan fleksibel dalam menyediakan sokongan fiskal yang diperlukan kepada rakyat dan perniagaan untuk kembali bangkit demi memastikan pemulihan yang mampan. Dasar fiskal berkembang tetap diteruskan dan digubal dengan terperinci untuk memastikan pertumbuhan dan pembangunan dalam menghadapi ketidakpastian dan risiko penularan semula COVID-19 yang berpanjangan. Susulan pakej rangsangan tambahan yang telah diumumkan Kerajaan untuk menyokong ekonomi, defisit fiskal pada tahun 2021 telah secara rasminya disemak semula kepada 6.5% kepada KDNK. Sehubungan itu, Kerajaan telah meningkatkan had hutang statutori negara kepada 65% daripada KDNK pada Oktober 2021 bagi membolehkan pelaksanaan langkah rangsangan sedia ada dan Bajet 2022, serta pada masa yang sama membantu mencapai objektif yang ditetapkan dalam Rancangan Malaysia Kedua Belas, 2021-2025 (RMKe-12).

Dari segi sumber pembiayaan, penggunaan pulangan pelaburan daripada Kumpulan Wang Amanah Nasional (KWAN) untuk mempercepat PICK adalah bersesuaian dan tepat pada masanya. Melangkah ke hadapan, Kerajaan komited untuk menggantikan semula dana KWAN dan meneruskan usaha ke arah matlamat konsolidasi fiskal seiring dengan pemulihan ekonomi, menetapkan sasaran pengurangan hutang yang realistik dan tegas bagi memastikan kemampuan fiskal dalam jangka sederhana dan panjang.

Mengulangi komitmen yang dibuat melalui Kenyataan Pra-Bajet pertama yang dikeluarkan pada Ogos, Rangka Fiskal Jangka Sederhana akan menerajui langkah konsolidasi fiskal, di samping meningkatkan kapasiti pendapatan, kecekapan perbelanjaan, dan kemampuan keberhutangan Kerajaan. Pembaharuan fiskal untuk meningkatkan disiplin dan tadbir urus akan dilaksanakan sejajar dengan usaha ini manakala Akta Tanggungjawab Fiskal (FRA) akan diperkenalkan pada tahun 2022. Selain itu, Strategi Hasil Jangka Sederhana akan diguna pakai untuk meluaskan asas cukai, mengukuhkan sistem percukaian dan melaksanakan kajian insentif cukai, manakala perbelanjaan awam akan disemak semula secara berkala untuk mengoptimalkan perbelanjaan.

Melangkah ke hadapan, seperti mana pentingnya dasar jangka pendek yang telah Kerajaan laksanakan untuk memulihkan sosioekonomi negara pada tahun 2022, adalah penting bagi kita memperkukuh asas ekonomi melalui pembaharuan institusi dan fiskal jangka panjang untuk mengembalikan daya tahan ekonomi supaya bersiap siaga dalam menghadapi sebarang kemungkinan pada masa hadapan. Bajet 2022 akan terus mengutamakan rakyat dan sektor ekonomi kita yang terkesan akibat pandemik ini, terutamanya dengan mewujudkan peluang pekerjaan dan memastikan bantuan bersasar tersedia untuk golongan rentan. Bajet 2022 juga akan membina asas bagi pembaharuan yang direncanakan dalam RMKe-12.

Pada masa yang sama, dalam mencapai matlamat digital nasional sejajar dengan Revolusi Perindustrian Keempat (4IR), Kerajaan akan mengutamakan usaha bagi memperkukuh keupayaan dan kemampuan digital negara, selain melengkapi tenaga kerja kita dengan kemahiran yang bersesuaian. Usaha ini memerlukan tonggak struktur digital negara dipertingkatkan untuk menyokong ketersambungan internet serta memanfaatkan teknologi 5G. Selanjutnya, pembaharuan yang digariskan dalam inisiatif seperti Aspirasi Pelaburan Nasional (NIA) dan PERKUKUH Pelaburan Rakyat juga akan diterapkan ke dalam rancangan yang sejajar dengan Matlamat Pembangunan Mampan (SDG) dan RMKe-12 untuk pertumbuhan ekonomi jangka sederhana dan panjang yang mampan, penambahbaikan keterangkuman sosioekonomi dan peningkatan kelestarian alam sekitar.

Dari segi tinjauan ekonomi, KDNK negara dijangka meningkat antara 5.5% hingga 6.5% pada tahun 2022, didorong oleh pembukaan semula lebih banyak sektor ekonomi dan sosial serta peningkatan permintaan luar dari rakan dagang utama. Faktor-faktor lain yang akan menyokong pertumbuhan ekonomi Malaysia termasuklah harga komoditi yang lebih tinggi serta pelaksanaan projek infrastruktur dengan kesan pengganda yang tinggi. Ini akan mengukuhkan lagi asas ekonomi kita, yang kekal berdaya tahan walaupun dalam tempoh mencabar ini, disokong oleh kemajuan, keampuhan dan kepelbagaian ekonomi.

Kerajaan akan memastikan negara ini pulih dari krisis pandemik tanpa mendatangkan kesan buruk jangka panjang terhadap ekonomi, namun adalah penting seluruh rakyat Malaysia berpegang kepada semangat Keluarga Malaysia dan berganding bahu mengharungi segala cabaran masa hadapan. Langit tidak akan terus mendung, dan melalui usaha sama kita, sinar baharu bakal melimpahi hari-hari mendatang yang lebih baik untuk tanah air tercinta agar kita kembali bangkit sebagai sebuah negara yang lebih teguh dan bersatu padu, *Insyaa-Allah*.



TENGGU DATUK SERI UTAMA ZAFRUL TENGGU ABDUL AZIZ
29 Oktober 2021